

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 2519 del 26/09/2024

En sunta as de 29 van leistagst va um 2 nomitto kultur, musik, pasuach pet viarer ont a marenn

Zòmmtrèff kan Filzerhof ver za vaiern de 700 jarder va de grundung

[Mòcheno] S Bersntoler Kulturinstitut organisiaert en sunta as de 29 van leistagst kan museum Filzerhof en Vlarotz an trèff ver za denken de sai' grundung as gaben ist en 1324.

Der programm sicht vour an kulturtrèff as de gschicht van heff, musik, pasuach pet de viarer ont a marenn. Der trèff ist ver en nomitto va um zboa envir.

Der advokat Marin Fischer va Kurtatsch bart hòlten a konferenz pet en titl "S institut van hoff as men nèt toaln mu' en de gschicht va Tirol ont haitzegento".

En Bersntol hòt men nia gahòp de instituzion van hoff as men nèt toaln mu', aa benns de heff en Bersntol sai' augòngen as an vurm as bolten noglaicht en sèll as pasiart ist pet de sidlung en òndra eirter en Tirol. De Hearn van sèlln zaitn, as gaben sai' u'punctn en de stòrch familia van Groven va Tirol, hom autoalt de ingern pèrng en stickler, de heff, ont an iats ist gem kemmen en an sidler abia as gatu' kemmen ist en bolten toaln van sèll lònt. Der sidler hòt gamiast hòcken, veròrbetn en grunt ont semm drinn paun en sai' sitz. Dervir, hòt er gem a schòrt va zins pròpe en de zait van schan mikeal, as de 29 van leistagst.

En Bersntol de doi sidlung hòt u'pfònkst en earste toal van 1200 en Garait ont en Oachlait ont ist derno envir gòngen en Vlarotz ont en Palai, bo as se se garift hòt en de earst jorzeichener van 1300.

De heff sai' autoalt kemmen zbischn de si', en de tochteren lai benn as koa' priader gahòp hòt. Der doi sistem van autoaln de pahalter, as kemmen ist van òltn romane ont as praucht kemmen ist en gònze Trentin, hòt trong za tea' eppas ver za hom nèt za vil autoalt de grinter en kloa'na stickler, iberhaup benn as der numer van lait sting ist. Eppas as tu' kemmen ist, zan mindestn van 1700 envir, ist gaben s sèll za suachen òndra òrbetn, abia zan paispil de sèll van krumer oder ver a zait de sèll van knòppn. Asou, pet a ker gèlt as as saitn galeikt kemmen ist, ist s meglech gaben za kaven òndra grinter oder za tea' auspaun oder vergreasern de paun as noat gaben sai' za trong envir de normaletn òrbetn van pauern.

Pet en gèlt gabungen as en hòndl der pauer van Filzerhof as de leistn van 1700 hòt gameicht auspaun ont vergreasern s haus ont kaven ondrà gruntsticker derzua en hoff. En u'vòng van 1900 der Filzerhof hòt gahòp acker, bisn ont a stuck bòlt ver zirka 20 hektar.

Der nomitto bart envirgea' pet pasuachen innbende en hoff, tradizionaleta musik pet de Palaeear Learmusikantn ont a marenn.

Der gònze trèff ist offet en òlla ont umansist.

(It)